



CENTRALE BANK VAN ARUBA

ENCUESTA RIBA CONFIANSA DI CONSUMIDOR – MEI 2012

Comunicado di prensa¹

Durante di e periodo di 26 di Maart te cu 12 di April 2012, Banco Central di Aruba (BCA) a tene su prome encuesta trimestral riba e confiansa di consumidor na Aruba, e asina yama “Consumer Confidence Survey” (CCS). E meta principal di e CCS ta pa provee BCA cu informacion valioso cual e lo usa den su analisis y proyecionnan macro-economico, pero tambe pa midi e sentimento di consumidornan Arubano cual lo por duna un miho bista riba desaroyonan economico. E CCS a consisti di 20 pregunta di opcion multiple (“multiple choice”) relata na e percepcionnan y expectativanan di e pueblo Arubano tocante e estado di e economia di Aruba y di su habito di consumo.

E CCS a aserca 400 persona di tur parti di Aruba. E resultadonan inicial pa e prome trimester 2012 ta muestra cu 34,0 porciento di personanan encuesta a sinti cu nan propio situacion financiero a empeora compara cu 6 luna anterior. Di otro banda, 33,8 porciento tabata tin e expectativa cu nan situacion financiero lo mehora den e proximo 6 luna. Tambe, 57,8 porciento a bisa cu condicionnan economico y comercial di Aruba a bai atras compara cu 6 luna pasa, mientras cu 32,3 porciento di encuestadonan a indica cu e condicionnan economico y comercial di Aruba lo sigui empeora den e proximo 6 lunanan.

64,3 porciento di encuestadonan a bisa cu tabata mas dificil pa haña un trabou na e momento ey compara cu 6 luna pasa, mientras cu den e siguiente 6 lunanan pa haña un trabou lo bira mas dificil (48,0 porciento) of lo permanece mescos (24,3 porciento).

Encuestadonan a indica cu compra di un auto (64,0 porciento), compra di un aparato grandi (51,5 porciento) y bai cu vakantie (49,8 porciento) no ta apropiada na e momento di e encuesta. Solamente 16,5 porciento a pensa cu e momento tabata apropiado pa tuma un prestamo y 13,8 porciento ta kere cu tabata e momento apropiado pa tuma un hipoteca.

BCA a traha un indice di confiansa di consumo pa resumi e resultadonan di e CCS den un solo indicador. E indice ta varia entre 90 y 110, unda cu scorenan entre 90-99 ta indica un bista negativo di consumidornan. Scorenan entre 101-110 ta muestra un bista positivo di consumidornan. Un score di 100 ta indica cu encuestadonan a raporta no ta mira ningun cambio. E resultadonan ta muestra cu encuestadonan tabata tin un bista negativo den e prome trimster (un indice di 96,2).

BCA ta plania e siguiente CCS pa e periode di 25 di Juni pa 06 di Juli di 2012. Por baha e presentacion completo di e resultadonan for di e website di BCA. Personanan cu lo desea di hanja mas informacion por tuma contacto cu Sra. Elmelynn Croes (tel. 5252230; email: e.croes@cbaruba.org) of Sr. Jonathan Upegui (tel. 5252215; email: j.uegui@cbaruba.org) di e Departamento di Investigacion di BCA.

Banco Central di Aruba
10 di Mei, 2012

¹ E original na Ingles ta prevalence